

## COMUNICÂT STAMPE

### COMUN DI CIVIDÂT VIE ADELAIDE RISTORI



### UN SPACÂT DAL ANTÎC ABITÂT METÛT IN LÛS MIDIANT DAI LAVÔRS DI RICUALIFICAZION

I cantîrs di ristrutturazion dal edifici logât li dal civic 15 di vie Adelaide Ristori, propit intal cûr dal centri storic di Cividât, ancjemò une volte a àn permetût di mostrâ la impuartance de archeologjie urbane: un mieç par scuvierzi e par fâ cognossi la articolazion dal tiessût abitatîf des citâts, in particolâr de antiche *Forum Iulii*, midiant des analisis stratigrafichis fatis cui ultins sgjâfs. Lis investigazions, realizadis de dite Archeotest s.r.l., a son stadis fatis sot de direzion sientifiche dal funzionari archeolic Angela Borzacconi par cont de Sorintendence Archeologjie, Bielis Arts e Paisaç dal Friûl-Vignesie Julie che e à sostignût lis spesis dai lavôrs, in sinergjie cul comitent (imprese Tilatti), daûr de normâl prassi di control che e rivuarde dut il centri storic - corrispondent ae *buffer zone* Unesco (dal 2011 la citât e je part dal sît seriâl *I Longobardi in Italia. I luoghi del potere 568-774 d.C.*) - e ancje cualchi aree sensibile dal comprensori dulintor.

La prime part dai lavôrs di sgjâf, finide ae fin dal an passât, e je stade fate sot dal imobil za esistent, dopo vêlu in part demolît e metudis in sigurece lis struturis architetonichis originjâls, fatis sù su muraduris de basse Ete di Mieç. Lis ricercjis a àn

permetût di confermâ la presince di un **edifici precedent, databil tor dai seculi XIV-XV**, cun tancj spazis intierâts doprâts tant che discjariis fin tal Cincent tart: tal lôr interni e je è stade cjatade massarie di taule e di cusine. Si trate di fuessis di scarie profundis che za tant prime a vevin intacât i rescj des **frequentazions plui antighis**, in particolâr di une **fase sepulcrâl** de alte Ete di Mieç, databile tra i seculi VI e VII tart.

Cun di plui, i sgjâfs a àn rilevât une fase abitative precedente, dai seculi V-VI: une strutture modeste costruide su rescj plui antîcs di etât tarde antighe, che a lôr volte a vevin rielaborât struturis di ete romane. Duncje, une **secuence stratigrafiche articolade** studiade pardabon fin in fonts par zontâ informazions gnovis ae cognossince de citât. La sielte di invistî risorsis economichis intal sgjâf invezit che te conservazion e je motivade de impuartance prioritarie di capî la secuence di vite dai contescj urbans. Di fat, cheste e je la maniere plui adate di valorizazion par chei câs là che lis soreposizions archeologjichis a son cussì complessis di no permeti une leture imediade e une musealizazion juste des struturis rinvignudis. Tal câs di citâts stratificadis tant che Cividât, chescj barcons archeologjics a son **ocasions di cognossince** veris che a permetin di capî lis dinamichis insediativis de citât e lis sôs trasformazions intal timp. La citât, di implant cesarian, e je nassude su la crosere di stradis comerciâls (par chest il non *Forum Iulii*), e in ete tarde antighe e à cognossût chel significatîf potenziament che le à fate diventâ une postazion difensive indispensabile: di fat e je stade sielte tant che sede dal prin dai trentecinc ducâts dal Ream Langobart in Italie. E à mantignût la sô impuartance ancje intes epochis sucessivis diventant un centri impuartant dal podê patriarcjâl.

*Traduzione a cura di*

**ARLeF**

**Agenzie Regionâl pe Lenghe Furlane**

via della Prefettura, 13

33100 Udine

tel. +39 0432 555812

email: [arlef@regione.fvg.it](mailto:arlef@regione.fvg.it)

pec: [arlef@certgov.fvg.it](mailto:arlef@certgov.fvg.it)